

册 叁
册

福建列傳卷十四

宋十一

趙彥侯字簡叔福州人魏王廷美八世孫未冠薦僑居於雲起判紹賜進士第歷常熟主簿鄂州法曹夔州錄事參軍因留惠州陞辭乞令郡改秩知安溪縣繼陳宓後潔廉豈躬與宓齊名縣小俸薄自食粗糲而竭力養母秩滿就部注兩浙轉運司主管文字歲餘丁艱服除提轄左藏庫坐失贓察吏盜金去俄予祠時方挈家抵京貧不能歸僑居於雲起判紹興府鑑湖久湮倅廳猶按舊額督租彥侯削去之遷知惠州陞辭乞令郡邑覈逃絕以定賦入既至視嶺海如內地待夷獠如平民清儉節縮軍府充實初譙樓頽圯米廩漏濕彥侯始改作鉅麗堅壯遂爲南州偉觀除西外宗正未幾改南外宗正攝知泉州兼提舉市舶適繼鑿殘化以廉平泉人大悅舶琛滿前更以例進笞而却之知饒州未至改擢湖南提刑屬寧宗親政精擇舉刺彥侯首被選巡歷吏卒視舊十省八九民間屈枉皆得自達

柳全道永之民咸曰自馬大同後六十餘年復見此公耳就除轉運判官
權帥事江北警報日至長沙彥侯鎮之以靜雍容如平日樞密院責造戰
艦賞以鉅萬彥侯嚴戢數配而先期辦集彥侯雖綿歷外官不及與聞時
論然憂國憂民遇事輒發其條上便民也如謂盜賊之原在守令宜加精
擇又謂米餉舊至江鄂而上糜費以銀近改撥至襄郢又以湖會折銀部
餉者多戕身破家宜易給現銀又謂湖湘之地大抵卑濕春夏漲潦則田
與江通至有抱砧基納有司者宜檢視蠲豁皆切於一路休戚其大者謂
楮幣不宜立界限又謂計畝數楮民怨已甚根本所繫焉可不思急迫之
政豈宜再舉又謂驍勢方強宜以守備爲經以和爲權久使湖外屢援禮
經引年不允乞祠又不允給假三月暫歸季春遊東巖下歸就寢中夜卒
有詔除直祕閣遂不及拜彥侯長身偉岸而標致蕭散於倫紀忠孝之際
至篤詩律琴趣妙一世尤工草書入仕踰四十年晚歸猶待糴而食嘗攝
潭帥所入僅五百千貽書其子曰盡以此得一小金嶽矣小金嶽者唐李

勉古琴之號也在蜀值吳曦之變不污僞命每戒子弟仕宦守廉勤自有見知者一念欲速心術先壞矣聞者以爲名言彥侯所居蕭寺洗剔屋後山名曰東巖與北山陳孔碩往還最密孔碩爲之篆扁有詩五十餘卷子三璉夫蔭授宣義郎知長汀縣壘夫登寶慶二年正奏知南劍州珣夫將仕郎

後村大全集
道光舊志

廖叔政字正臣晉江人慶元二年武舉歷賓州上林循州興寧二縣令瓊管寇作帥檄叔政督捕以捷聞復勦桂州古縣徭寇臺閩上其功辟守吉陽軍歷知高州邕州逾歲丐祠歸里里有海寇之警與同邑儲襄募集民船掩獲其酋郡守眞德秀薦守金州命未下卒

閩書

徐鳳字子儀浦城人十九舉於鄉慶元二年中進士第三漳浦簿未上服所生父喪祖母年八十請監南嶽廟以養祖母卒承重服除教授溫州溫多士爲東南最而好訾議難帖服鳳年甫三十餘端重善開迪不嚴而威名卿大夫爭遣子弟從之游秩滿得國子監書庫官始試博學宏辭垂中

矣以一字疑而黜及是再試又以一事而黜知貢舉曾從龍帥其僚薦於朝謂其詞精記博非作者不能及且聞其始第再勾閒局以便親養鄉黨稱孝文學行義於是兩至宜被褒擢或籍記中書備異時翰墨選明年除吏部架閣又明年除太學錄金兵自光州退朝野皆言其國有內變且力弗支鳳因對言善爲國者不以敵至而懼敵去而喜大羊之性情難測逡巡而示弱安知非見羸以誘我恭順而請和安知非遷延以欸我俄遷武學博士嘉定十二年召試除正字未幾兼翰林權直遷校書郎又爲秘書郎內直如故鳳於辭命最爲得體上將親策士召使視草禁中諭之曰卿訓辭溫厚宜居代言之任鳳頓首謝無何以疾請主管華州雲臺觀居數月起知荆門軍未對晉宗正丞兼司封郎官俄兼學士院權直遷將作少監權直院先時乘輿出入他官職攝內命者不在屬車豹尾間至是旨令扈從遂爲故事兼尙右郎官玉牒所檢討改兼國史院編修實錄院檢討又遷秘書少監以疾請外直顯謨閣知贛州疾革請致事直寶文閣進一

秩未拜終于家初山東諸豪新有功未見跋扈狀鳳對策言蓄毒所以攻疾而施之常服則元氣必傷虎不縱之山林而豢之家庭久將噬人矣諸葛亮曰民困兵疲事不得息則住與行勞費等爾今忠義之徒官供家請誠不可已盍亦鼓舞歡動之俾常以逐北爲利不復懷巢南之安則責望於我者輕否則急行賈誼衆建諸侯之策爲置部落而少其力少力則易使以義黨與散則無邪心他所論列皆切中時病卒之年四十有八有內制十卷十箴一卷自人主以及宮掖下及公卿大夫規切畧徧弟鳳鸞俱有文名鳳官翰林侍講鸞中書舍人子三莘老蔭補從事郎累官禮部尙書華老嘉熙二年進士累官國子監司業夢發傳在忠節

真西山先生集

浦城縣志

鄒應龍

一作應乾一作應隆今從宋史本傳

字景初泰寧人幼家貧無書手鈔春秋三傳以

讀其學有得於孟子不動心好善優天下之說慶元二年中省試進士第

二人寧宗以諫陰不親策賜正奏名及第出身有差適省元莫子純已有

官遂易應龍爲第一人。歷知南安軍五年，召除祕書省正字。開禧元年，累遷起居舍人。韓侂胄開邊，應龍議不合。除直龍圖閣，出知贛州。貧民多棄子不育，應龍建慈幼院，收養括諸邑。通租贍之。遷江南西路提點刑獄。侂胄誅，召拜中書舍人。嘉定元年，假戶部尚書充賀金主生辰使，還奏金主望之不似人君，其國必亡。除太子詹事。二年，遷給事中，兼權吏部侍郎。因封駁忤宗意，遂以寶文閣待制出知泉州。以賈胡簿錄之，賞請于朝。大修郡城，卽明倫議道堂，開六經閣，造石橋於筍江下，流長百五十餘丈。時南內宗子商于泉者多，橫應隆以法繩其稔惡者。五年，進龍圖閣待制。改知建寧府，尋移知池州。九年，進煥章閣直學士，爲廣南西路經畧兼知靜江府。平黎州盜及邕蠻之亂，誅首惡宥脅從。十三年，進敷文閣直學士，爲荆湖南路安撫使，兼知潭州。丁母艱，歸。值本邑水災，發已粟以賑。寶慶元年，除工部尚書，入對論與金人和戰利害，稱旨。尋遷刑部尚書。真德秀、魏了翁爲史彌遠所忌，諫官希旨劾罷二人。應龍抗疏請留坐，是與彌遠不

合罷歸紹定二年汀州寇蔓延至邵武應龍避地鍾山告急於閩帥兵不
發應龍乃聞於朝詔起陳韓爲招捕使討平之俄州兵亂土豪乘勢負怨
相圖禍逮平民應龍爲具牛酒解之已而召拜禮部尙書會郊祀雷雨因
陳恐懼修省及玉器之說嘉熙元年拜端明殿學士簽書樞密院事權參
知政事舉賢才抑宵小夙夜以國事爲憂甫四月引年請去御書南谷二
大字賜之累加太子少保光祿大夫淳祐四年卒贈少保謚文靖應龍數
爲當路所擠理宗信其無他故寵眷不替試禮部時爲試官葉挺所得士
挺麗水人妻以女應龍因隨挺家麗水麗水人名其所居曰德星里弟應
麟嘉泰二年第進士從弟應博受學於廖德明開禧元年登第寶慶中由
武昌尉累遷監行在都進奏院輪對引書危微精一以朱子之說進理宗
嘉納歷知婺蘇二州真德秀薦其才擢提點江南西路刑獄

四朝聞見錄
閩書道光舊

七

趙萬年字方叔長溪人中慶元二年諸科

一作是
年武舉

調京廣制置司幹辦公

事開禧二年金人破神馬坡遂進兵圍襄陽府帥司諸寮屬相繼逃匿萬年曰人患不得死所耳死王事得所矣於是繕兵貯糧力贊安撫使趙淳勉諭諸司幕職各以死國爲心作書反間金師以緩其攻復募壯士三千人據大望山絕金人糧道相拒九十餘日金兵乃退初江陵副都統魏友諒敗於神馬坡突圍趨襄陽未至統制官呂渭孫謂友諒已死遣所部至帥府脅求兵印萬年以強敵在外內變若成則襄陽危矣乃往說之曰足下手殺朱勝自副將而統制已遷四職都統制懷中物耳果能卻敵節鉞且旦夕況都統乎渭孫然之歸報淳而友諒已入城與淳會飲黎明渭孫聞友諒尙在率人馬自北門入欲圖友諒友諒偵知之預爲備渭孫遂爲友諒所殺皆萬年力也以功進武德大夫

閩書

林仲虎字景瞻寧德人中慶元二年武舉廷試第二人嘉泰閒檢詳林楠使金辟爲屬官金人邀私覲仲虎力辯不屈開禧初禮部侍郎李壁充賀金國生辰使仲虎復副之旣渡河或傳有變衆惶惑仲虎條三策以爲不

爾有死而已後卒無他金廷賜宴值宣仁后忌日仲虎辭飲金人不能奪
歸言樂因循者徂於私意銳進取者病於寡謀爲今之計當重發而必成
不可輕出而苟且疏奏忤韓侂冑意出守光州時金人圍和州帥戚供與
仲虎不協徑自厯陽移戍采石仲虎以百人護江力請於朝乞發兵馬策
應得強弩千餘人應援金兵乃退後宰執復舉仲虎使議和除右騎衛中
郎將充通謝副使至揚州聞淮西失而止仲虎能屬文尤長於詩有百將
詩及雜詩行世同邑武舉黃石孫孫應龍皆知名

閩書道光舊志

李冲字道卿侯官人登慶元五年進士第調汀州司戶參軍浙東路提點
刑獄司幹辦公事辟充淮東安撫司幕官四川制置使侍郎崔與之薦於
朝冲獻所撰籌邊十議擢國子學錄嘉定八年自春洎夏不雨詔中外臣
僚言事冲條上六事其一謂今日之患大抵忠厚變於刻深老成奪於新
銳公言鬱於偏是遠謀阻於近功追勒編竄先朝所以處巨姦今州縣吏
小有註誤輒從重典故侯宿將宜勤守禦不無尺寸功一旦以財物失陷

遽膺峻罰知之者以爲當罪不知者以爲寡恩願下寬大詔書毋以小愆
傳重比毋以一眚棄前功其二謂鐵錢輕而兩淮之貧民怨鹽法變而江
湖之富民怨新楮之令嚴而天下之民胥怨且安邊一司提領非人爲民
毒害願削厚斂之無名者還簿錄之非享者其三謂湖上賜園所以優戚
里之恩而用工太繁闢地太廣中宮知民疾苦陰鄧懿親制節謹度人所
共知不當以是累其美其四謂政宣閒道教興行至有號爲女真者爲金
人入寇之兆比年此風復熾甚者凌轢官府豪奪民田願以政宣爲鑒嚴
左道之禁杜私謁之門則宮闈肅官府正矣其五謂將佐陞差以締結守
牧論薦以夤緣天府帑藏大半耗於供饋諸軍亦然是以州郡不免侵漁
主將易至掊剋願戒飭中外勵清白之操杜賄賂之源其六謂讒說巧言
虞周不免特吾無可乘之閒爾禍漢者江充禍唐者李輔國然武帝明皇
本無隙可投彼亦何所肆其巧哉願銷讒言固邦本實宗社無疆之休其
言切至爲中外傳誦又奏事殿中言謹簡宮僚所以輔成儲德今主恩元

良令聞日新然端人正士進見之時寡而便嬖瞽御親昵之時多臣未見其益也他所論太尉古三公官貴戚未聞有橫草勞輒寘右階極品宦寺與政事內帑付私人非祖宗令典聞者壯之越二年遷本監主簿丐外未補而卒子遇

遇字用之自號洞齋受業於真德秀登嘉定七年進士第需次績溪縣令端平元年廷議大舉收復三京遇應詔上封附驛置以聞畧言荆帥圖上陵寢淮闕抵掌關河陛下輕信兵端遂啟自丙寅妄動剜肉醫瘡垂三十年未合詎堪再壞復言南陽之燄炙人虢國之門如市奄人竊弄女冠闌入清明之氣如此旦晝之桎可占語皆切至以邑最改京秩嘉熙三年遷監察御史會有詔集議邊事遇上疏歸咎首謀復云和之陷人其猶酖乎寸地不可棄小使不可納也其議和戰大旨如此同列有不樂遇者揚言曰既罪戰將主和平衆遂譁然謂遇特爲史嵩之地是冬改祕書少監俄除職予郡皆不拜丐祠主管雲臺觀淳祐四年起知潮州擢廣南東路轉

運判官以事罷得直詔復原官予祠卒

真西山文集

陳貴誼字正甫福清人父宗召字景南淳熙二年第進士紹熙四年復中博學宏詞科仕至工部尙書贈太師貴誼登慶元五年進士乙科年方十七寧宗注視良久宗召時以起居郎入侍薦紳榮之授瑞州觀察推官嘉定元年試博學宏詞科入選歷江南東路安撫司主管機宜文字累遷太學博士輪對言人主令行禁止者以能同民之所好惡今楮券之令乃使姦惡獲逞道路怨咨非所以固結人心因援熙寧新法爲辭遷太常博士以兄貴諫方兼禮部郎官引嫌改將作監丞兼魏惠憲王府小學教授輪對奏言觸犯忌諱者指爲好名切劘時政者指爲玩令利害關於天下是非公於人心一人言之未已或至累十數人言之則指爲朋黨邪正易位忠佞不分恐非國家之福七年除祕書郎未幾除禮部郎官屬金人大擾淮蜀貴誼指陳時弊畧言人才倖進言路不開賄賂公行軍法廢弛恥言敗北則陣亡者不卹恥言奔潰則逃竄者復招彌遠惡其激切諷諫官論

罷起知徽州召授司封郎官權直兼玉牒所檢討官會有事明堂首引色
拯皇祐中乞因肆赦除聚斂培克之弊做成周邦饗必及死王事者之子
與漢置羽林孤兒專取從軍死事之後教以五兵不果行寶慶初遷中書
舍人將郊貴誼以民主實艱吏員尙衆征斂幾於奪取公費掩爲私藏宜
大明黜陟庶有以饗帝格天除禮部侍郎紹定五年遷禮部尙書未幾除
端明殿學士簽書樞密院事六年冬理宗始親政拜參知政事面諭之曰
頃聞憂國之言朕所不忘命兼同知樞密院事端平元年朝議出師汴洛
貴誼已移疾猶上疏力爭五上章乞歸卒贈少保資政殿大學士諡莊定
初福清海口鎮去邑二十餘里往來貿易者稅凡三次民不堪命嘉泰間
宗召嘗上疏請罷議中格貴誼侍經筵日復力言之理宗可其奏福清人
以爲世載其德云兄貴謙字益甫嘉泰二年中博學宏詞科賜同進士出
身嘉定六年遷著作郎出知安慶府累遷禮部郎中終提點江東刑獄山

集宋史道

光舊志

蘇大璋字顥之古田人慶元五年進士除道州教官以闡明正學爲己任
召試館職爲祕書省正字累遷著作郎時方嚴僞學之禁大璋轉對力言
其不可執政惡之出知吉州卒於家初大璋父鴻有陰德及大璋貴邑嘗
大水壞民廬田歲以不登大璋爲邑上書詔遣常平使者賑貸鄉人尤德
之古田縣志

曾從龍字君錫初名一龍晉江人慶元五年進士第一人寧宗爲改今名
賜七言四韻詩聞喜宴賜詩自是始授簽書奉國軍節度判官廳公事遷
兵部員外郎左司郎中起居舍人兼太子右諭德使金還轉官疏言州郡
累月闕守而以次官權攝彼自知非久何暇盡心幸而除授民望其至如
渴仰飲足未履境又復他罷郡帑所入歲有常數每易一守供帳借請少
當不下萬緡望明詔二三大臣郡守有闕卽時進擬求避憚行者悉杜絕
之開禧間旬外知信州戍卒行掠境上捕至搜其身得婦人衣立梟于市
召權禮部侍郎兼中書舍人兼太子右諭德繳還張鑑復官詞頭尋兼太

子諭德兼同修國史實錄院同修撰兼國子祭酒爲吏部侍郎兼太子右庶子給事中直學士院進禮部侍郎充金國生辰使擢刑部尙書嘉定六年秋陰雨乞放繫囚進對言修德政畜人材飭邊備七年知貢舉進端明殿學士簽書樞密院太子賓客改參知政事疾胡桀愾壬排沮正論奏陳其罪桀嗾言者李楠劾罷之以前職提舉洞霄宮起知建寧府寶慶初除湖南安撫使世忠峒獠讐殺嚴兵壓境示以威信諸峒帖然在鎮二年擢式用之羸卻例卷之入創平糴倉新廟學湘人紀之改知隆興府復提舉洞霄宮改萬壽觀端平元年授資政殿大學士沿江制置使兼知建康府兼行宮留守趣過闕奏事留拜參知政事兼同知樞密院事時有二京之役極論南兵輕進易退未幾言驗進知樞密院事兼參知政事以樞密院使督視江淮荆襄軍馬疏言邊面遼遠聲援不接請並建二關詔許專界江淮以荆襄屬魏了翁旣而朝論患邊用不給遲其行有旨留之樞筦命了翁併領督府從龍始志不遂悒悒卒贈少師

用虎字君遇從龍弟以兄任歷知寧海尤溪縣通判福州紹定中知興化軍時汀邵山寇數發前守王克恭倡議築城亡何卒判趙汝盟繼之尋亦卒民間訛言地不利且罷民用虎曰城能死守耶城而不城將死民也且民罷孰與死築之環七里有奇明年蠲夏稅之半以撙節贏餘代民輸納以酬其勞建平糶倉出楮幣萬六千緡爲糶本益以廢寺穀使價常平又建三步泄溉田千頃修太平廢陂丞白用松性耐水裡松表石亦可儉用虎曰木不壽石悉石之陂成民名曾公陂害民豪右必彈壓之招捕使建守陳韓以最聞韓移江右舉自代除府事改江西提刑時叛兵甫平支黨反側或勸用虎間道兼程用虎携孥徐進待以不疑卒帖息承韓盪寇之後悉力拊摩江右遂安遷轉運判官召爲吏部侍郎再除工部以華文閣帥廣西至鎮數月罷未幾卒

治鳳字君儀用虎弟開禧元年進士知富陽縣通判漳州知惠州擢廣東提刑以將作監丞知袁州就畀漕節直煥章閣帥廣東愛惜公帑不靡豪